

韓大中丞奏議

韓大中丞奏議

受業

馬錫蕃

編次

鄭長昕

次孫泰 華敬錄

卷之六

目錄

請借兵丁銀米疏

請免解節省銀兩疏

籌撥加賞口糧銀欸疏

請遞展熟田災緩積欠錢糧疏

驗收徒陽運河挑工疏

審擬阜寧縣民蘇萬全京控疏

特叅驗審草率偏執原詳知縣疏

請動欸修辦海口椿柵疏

請以故河臣入祀名宦疏

籌辦三吳水利疏

請豁部駁銀款疏

清單

查勘吳淞運道疏

興修三吳水利疏

截停浙省幫船興工徒陽運河疏

審明劣衿創刊鄉規感衆斂錢疏

謝賞養正書屋全集疏

請借兵丁銀米疏

奏為駐劄歉收地方營分循例懇

恩借支糧餉銀米分季扣還歸欸以恤兵艱仰祈

聖鑒事竊照蘇省所屬各營坐落地方偶逢歉收之

歲歷經

奏請借給銀米有案本年蘇松常鎮太五府州屬

雨水過多田禾被浸茲據劉河等各營先後詳

報因駐劄歉區米糧昂貴兵丁買食維艱循例

請借銀米均經臣等批司查議去後今據蘇州布政使王輅詳稱查明各營均係駐劄被水地方應請准其借給一季銀米核計劉河太湖左右川河孟河柘林金山青村撫標左右蘇州提右南匯福山江陰楊舍靖江蘇松鎮標中左右奇鎮江吳淞常州京左平望提標中左前後城守京右高賢等各營通共請借餉銀七萬二千四百九十七兩七錢米一萬七千五百七十二

石五斗照例從道光四年春季為始同上屆各  
營請借案內銀米除已經扣歸一半外尚有未  
扣一半舊欸統計勻分八季一並扣還歸欸請  
餉時於司庫正項地丁銀內動支兵糧米石於  
各屬新舊南米並現在緩缺請截熟田漕米項  
下撥給詳請具

奏前來臣等伏查各營兵丁偶遇歉年歷經奏奉  
恩准借給銀米有案本年各屬秋禾被淹情形較重

據稱米糧昂貴兵丁糴食維艱尚係實情自應  
循例恭懇

聖恩准其借給一季銀米統於道光四年春季起同  
上屆未扣一半銀米在於應支月餉分作八季  
攤扣還欸以裕兵食除飭司分別動放外謹合  
詞恭摺具

奏伏乞

皇上聖鑒



請免解節省銀兩疏

奏為採辦紙張節省銀兩請免扣解統歸地丁報撥以濟經費仰祈

聖鑒事竊照蘇省每年京員採辦紙張等項價腳銀內奉部飭扣節省銀兩於司庫地丁銀內扣出造入估餉冊內報部撥用嗣於乾隆四十七年經部行令委員解部卽從是年起至五十一年止先後委令便員搭解其五十二年起至六十

年止因扣存節省銀兩為數較多便員難以照  
料如專員起解運費無出咨准照舊造入估餉  
冊內報撥嘉慶元年以後又奉部行所扣節省  
銀兩仍行解部迨嘉慶十年起至二十三年復  
扣存銀兩為數較多難以解部時值江寧賑卹  
需銀

奏明湊撥濟用並請嗣後實用實銷毋庸再扣節  
省統歸地丁報部撥用旋准部覆已撥賑卹應

毋庸議其二十四年起行令查照成案辦理等  
因各在案今據蘇州布政使王輅詳稱京員採  
辦紙張等項奉部飭扣節省銀兩係按派辦料  
物而計每年自數千兩至萬餘兩不等如嘉慶  
二十四年至道光三年共扣節省銀三萬三千  
八百八兩零銀數較多勢難搭解若委員專解  
運費無出是以請免解部且本年蘇省被淹災  
重庫項支絀所需賑卹等項無款動支業經

奏撥鄰省庫項濟用來歲兵餉不敷尚須核數另  
請協撥所有採辦紙張節省銀三萬三千餘兩  
現在蘇庫需用甚多未便仍前扣出起解應從  
嘉慶二十四年起免其扣解統歸地丁報撥以  
歸簡易而裕經費詳請具

奏前來臣細核該司所詳既省領解之煩且裕餉  
需之用一轉移間於庫欸益昭簡便除咨明戶  
部外理合恭摺具

奏伏乞

皇上聖鑒訓示

籌撥加賞口糧銀欸疏

奏為籌撥

加賞口糧銀欸仰祈

聖鑒事竊臣等接准部咨道光四年正月初二日奉  
上諭上元江寧句容高淳六合江浦江都儀徵吳江  
震澤常熟昭文崑山新陽青浦太倉鎮洋十七州  
縣原查十九八七分戶口又長洲元和宜興華亭  
婁縣金山江陰七縣除十分九分次貧戶口歸入

捐賑辦理外所有極貧戶口及銅山縣原查五分之四百九十五莊豐縣勘不成災之新村等十一里沛縣原查五分之坊一等十二里勘不成災之千一等四里睢寧縣勘不成災之木橋等十八社並揚州衛坐落江都儀徵徐州衛坐落銅山豐縣乏食貧民軍佃均加賞一月口糧以資接濟等因  
欽此 臣等跪讀之下仰見

聖主惠愛黎元

恩加無已之至意當經恭錄轉行江蘇兩藩司欽遵  
頒發騰黃曉諭籌備銀欸詳請撥放去後茲據  
江寧布政使張志緒詳稱按照上元等縣衛正  
賑極次貧戶口核計約需銀二十三萬五千餘  
兩除上年正賑剩銀十二萬九千餘兩抵放外  
尚有不敷因司庫錢糧連年蠲緩無欸動撥移  
查龍江關堪撥銀六萬兩淮宿關堪撥銀二萬  
六千兩揚州關堪撥銀二萬兩共堪撥銀十萬



六千兩又據署蘇州布政使林則徐詳稱吳江  
長洲等州縣按照正賑極次貧戶口除分別歸  
入捐賑辦理外核計尚需銀十八萬兩司庫現  
存春撥十二萬二千餘兩堪以動用移查許墅  
關可撥六萬兩各詳請

奏明撥用前來臣等覆加察核該司等請撥銀兩  
均係照例核計在所必需相應

奏懇

天恩俯准按數動撥以資接濟如有餘剩解司還欸  
設有不敷當於司庫正項欸內撥給並飭該管  
道府州督查戶口核實開報一俟撥到銀兩親  
查散放務期實惠均沾仍隨時嚴密察訪如有  
胥役尅扣冒濫情弊立即據實嚴叅究辦所有  
籌撥口糧銀欸緣由謹合詞恭摺具

奏伏乞

皇上聖鑒訓示

請遞展熟田災緩積欠錢糧疏

奏為熟田災緩積欠錢糧懇

恩俯准按年遞展分限帶納以紓民力事竊照江蘇  
省上年旱潦歉區先經臣等奏蒙

恩旨分別蠲緩復查明成災田地通境五分以上  
之高淳吳江等州廳縣衛熟田錢漕援例

奏邀

恩准概予緩徵一面飭將未被災之成熟村莊應徵

熟田錢糧並屆限應徵節年舊欠體察情形轉  
飭啟徵去後茲據江寧布政使張志緒詳稱查  
江淮揚徐海五府州屬自嘉慶二十三年起至  
道光二年止積欠錢糧除道光三年災區積欠  
照例分別蠲緩其餘熟田未完銀米應於秋後  
照常徵輸第均係積欠之區若責令依限帶納  
是小民以一歲之所收完節年之糧賦力有未  
逮所有上元江寧句容江浦六合山陽阜寧清

河桃源安東鹽城高郵泰州東台江都甘泉興  
化寶應海州沭陽贛榆二十一州縣並淮安大  
河三衛熟田應徵災緩地漕銀米等項請從道  
光三年秋成後起最遠年分帶徵一年由遠而  
近以次遞及其徐州府屬之銅山豐縣沛縣蕭  
縣碭山邳州宿遷睢寧八州縣並徐州衛連年  
積歉閭閻匱乏較之江淮等屬更甚成熟之區  
勉完新賦所有熟田積欠請從道光四年秋成

後起帶徵一年並據署蘇州布政使林則徐詳  
稱查常熟武進丹徒丹陽金壇五縣自嘉慶二  
十三年起至道光二年止歷年災緩積欠錢糧  
先於道光二年秋災案內奏蒙

恩准展至道光三年秋成後各就最近年分帶徵一  
年在案茲該五縣上年復經被災卽有薄收皆  
係倍費工本旣徵當年新賦復令帶徵積欠民  
力殊形拮据請照奏明分徵原案再行展至道

光四年秋成後各就最近年分帶徵一年以次  
挨年催納又道光三年成災五分以上之吳江  
昭文崑山奉賢上海南匯青浦清河宜興荆溪  
太倉鎮洋寶山十三州縣並蘇州太倉鎮海金  
山四衛幫熟田舊欠亦因民力未裕完納不前  
並請於道光四年秋成後起作兩年帶徵完欸  
各等情詳請具

奏前來臣等伏查江淮等屬嘉慶二十二年以前

節年未完災緩錢糧因頻年災歉不能以一歲之所獲償數年之逋賦經前任督撫臣等酌核情形於嘉慶十五二十一等年

奏請分徵在案今上元江寧句容江浦六合山陽阜寧清河桃源安東鹽城高郵泰州東台江都甘泉興化寶應海州沐陽贛榆二十一州縣並淮安大河二衛道光三年成熟村莊多係頻年積歉除徵新賦外其積欠自嘉慶二十三年至



道光二年止災緩地漕銀米等項合無仰懇

皇上天恩俯准從道光三年秋成後起就最遠年分  
帶徵一年由遠而近以次遞及又銅山豐縣沛  
縣蕭縣碭山邳州宿遷睢寧常熟武進丹徒丹  
陽金壇十三州縣並徐州衛連年災歉成熟之  
區勉完新賦勢難帶納舊欠請展至道光四年  
秋成後起各就最遠年分帶徵一年以次挨年  
催納吳江昭文崑山奉賢上海南匯青浦清河

宜興荆溪太倉鎮洋寶山十三州縣並蘇州太  
倉鎮海金山四衛幫薄有收成之區悉係車庠  
補種倍費工本若將熟田舊欠責令與新賦並  
納徒費催科請於道光四年秋成後起分作兩  
年帶徵以恤民隱而裕

國課除飭查造分徵緩帶細冊咨部外所有江蘇  
各屬熟田災緩積欠錢糧酌核分徵遞展徵收  
緣由謹合詞恭摺具

奏伏乞

皇上聖鑒訓示



驗收徒陽運河挑工疏

奏為驗收徒陽運河挑工並開損後催提漕船緣  
由恭摺奏祈

聖鑒事竊照鎮江府屬丹徒丹陽二縣運河為江浙  
兩省漕船經由要道該處河面窄狹水無來源  
全藉江潮灌注用資浮送惟江潮挾沙而行水  
去沙停易致淤滯向於回空過竣擇淺挑撈屆  
六年大挑一次以利漕運上冬輪屆小挑先因

夏秋雨水過多江潮異漲河身受淤較重以致  
冬深水弱浙省回空幫船進口時有淺阻經臣  
節飭該道府將擱淺船隻設法推挽南下其餘  
未經進口之船籌議截畱埧外先行煞埧挑河  
俟啟埧首先催提進口臣親詣勘估工段銀數  
業已恭摺具

奏一面嚴飭該道府督飭各工員遵照原估寬深  
丈尺趕緊如式趲挑務使一律深通報候驗收

去後茲據署常鎮道錢俊鎮江府知府羅琦先後稟報督飭工員集夫挑挖幸天氣晴和人夫踴躍通工將次完竣臣隨於正月十六日自蘇起程前進鎮江自丹陽尾工起至江口大埧止逐段親加查勘所挑寬深丈尺均與原估相符其餘撈淺各工亦皆如式閘撈並無草率偷減情弊隨飭將各子埧封墩次第起除全工驗畢後卽於二十日將兩頭大埧開放目擊江流下

注勢甚通暢當將鎮江首幫重運漕船試行順利隨飭令該道府將上年截畱坝外之浙省回空船一百餘隻首先催提進口趕緊歸次受兌仍催令鎮常蘇松重運各船陸續前進渡江北上並飭沿河各營將備一路催趲務令接續遄行倘有脫幫遲悞卽當據實叅辦臣謹會同協辦大學士兩江總督臣孫玉庭恭摺具

奏伏乞

皇上聖鑒奉

硃批知道了





審擬阜寧縣民蘇萬全京控疏

奏為遵

旨秉公嚴審定擬奏祈

聖鑒事竊照阜寧縣民蘇萬全赴京呈控岳可維等  
殺害伊弟蘇萬有身死賄買洪萬淋頂兇一案  
經都察院奏奉

諭旨此案着交韓文綺親提人證卷宗秉公研審按  
律定擬具奏原告蘇萬全該部照例解往備質欽

此並准兵部將原告蘇萬全遞解到蘇遵卽飭  
提人卷至省臣查此案控關謀命頂兇罪名出  
入綦重訊辦倍宜詳慎隨率同署臬司王賡言  
蘇州府知府額騰伊等臣親督提集犯證逐一  
隔別研審緣洪萬淋籍隸安東蘇萬全梁萬和  
均籍隸阜寧梁萬和同弟梁萬興梁萬昌向在  
阜境黃河南岸合開魚行蘇萬全另在北灘王  
姓魚行幫夥彼此素有訟嫌道光元年七月十

八日梁萬和弟兄三人雇船至黃河北灘收買魚鰾將錢先給漁戶陸珍侯定買嗣嫌魚鰾潮濕欲令還錢爭鬧經陳大學勸將魚鰾十一觔折作十觔合錢完事陸珍侯受虧不甘向蘇萬全告知蘇萬全因與梁萬和弟兄本有讐隙並風聞梁家欲在北灘開張魚行爭奪生意更抱不平許為陸珍侯出氣二十二日蘇萬全糾同陸珍侯並馬芳等坐船前往梁萬和等船邊當

卽過船梁萬昌攔阻蘇萬全用刀劃傷其右臂  
膊右胎膊又同將梁萬和等弟兄用繩網縛在  
船惟時蘇萬有未經同往比有賈正宏勸解蘇  
萬全告以梁萬和等平日多收漁戶行用錢文  
欲令立票還錢並另寫永不許至北灘收取用  
錢筆據梁萬和等無奈應允蘇萬全將梁萬和  
船內魚鰓錢文約共作錢十五千因數不敷勒  
寫錢票又不信梁家弟兄經賈正宏出名代寫

一百三十五千之票始將梁萬和弟兄解放蘇萬全將票分給漁戶而散梁萬和等畏先不敢指告旋據梁萬昌將賈正宏控縣捏稱被劫冀俟賈正宏到官供出蘇萬全等差掣究辦經代理縣姚廷臣驗傷會勘提訊勒緝九月十一日蘇萬全之兄蘇萬百弟蘇萬有同在堂母舅沈成壁家修理農具蘇萬全並未同往梁萬和訛聞蘇萬全弟兄一同在彼起意捉掣送官卽糾

允洪萬淋並屠正祖秦鳴鳳及已故之周履泰  
一共五人分掣刀鎗鞭棍往捉其時賈正宏因  
錢票係伊出名代寫趕往該處欲為說和梁萬  
和不允並令同行十二日偕抵沈成壁家一齊  
進內屠正祖與周履泰將草屋北間榻扇撥落  
蘇萬百走出周履泰用鎗戳其右膝受傷躲避  
洪萬淋見草屋南間芭門關閉心疑有人躲在  
裏面用刀向芭門戳進因刀長勢猛深透入門

卽聞哼聲洪萬淋拔刀見有血污當與梁萬和  
等逃散緣蘇萬有在內聞嚷窺探甫至芭門邊  
斜立猝值刀戳傷由右肋橫透左肋卽時身死  
蘇萬百報縣驗緝旋據縣差訪獲洪萬淋訊認  
將蘇萬有用刀戳死迨經覆訊洪萬淋畏罪圖  
翻因岳可維曾談論伊等行兇生事卽捏供梁  
萬和先向岳可維商議岳可維主令同去捉挈  
復因屠正祖在逃推賴屠正祖之子屠殿元戳

死屠正祖囑其權認正兇等語該前縣賀雲舉  
詳經飭委山陽縣會訊一面差挈屠正祖等未  
到二年二月二十六日蘇萬全探知屠正祖屠  
殿元父子在龔家集躲避糾同馬芳等前往捉  
挈適屠正祖父子與獵戶汪六在彼閒談見而  
幫助即將打獵鳥鎗點放轟傷馬芳左胳膊左  
手指汪六當時逃逸屠正祖屠殿元被蘇萬全  
等及在該處放賑委員孫逢瑞連鎗獲解該縣



提訊屠殿元先不承認及被洪萬淋堅質年輕  
畏刑含糊招服迨經會訊屠殿元極口呼冤洪  
萬淋亦卽據實供明蘇萬有委係該犯隔笆戳  
傷致斃不諱蘇萬全因洪萬淋曾供岳可維主  
令糾毆屠殿元亦供認行兇疑有賄買頂兇情  
弊赴臣衙門呈控批司飭審因犯供支離閃爍  
尚未成招蘇萬全赴都察院呈控奏奉

諭旨交臣審辦屢提人證督同司府訊悉前情臣恐

洪萬淋實係受賄頂兇疊加研詰堅供如前復訊屠殿元供稱先因被洪萬淋堅質且恐受刑隨口混認其實當時並未同至沈成璧家衆目共覩質之在場要證各供僉同蘇萬全亦自認懷疑妄控矢口不移似無遁飾查洪萬淋聽從梁萬和往捉蘇萬全等未見輒疑芭門內有人藏躲用刀猛戳致在內之蘇萬有被傷身死核與同謀共毆有間而蘇萬全毆細梁萬和等並

取其船上錢物蘇萬有未經同往亦非有罪之人今洪萬淋將其傷斃自應仍以鬪殺科斷洪萬淋合依鬪毆殺人者不問手足他物金刃並絞律擬絞監候秋後處決據供親老丁單是否屬實應俟秋審時照例查辦梁萬和因伊弟兄被蘇萬全細毆勒票並不據實告官輒糾眾持械捉拏以致洪萬淋將蘇萬有戳死實屬肇衅釀命梁萬和應革去監生比依原謀杖流律杖

一百流三千里屠正祖秦鳴鳳聽從持械同行  
並未下手應比照餘人律各杖一百屠正祖所  
供馬芳鎗傷係獵戶汪六點放汪六現係在逃  
恐狡供避就應將屠正祖監禁勒拘汪六到案  
質明辦理蘇萬全京控岳可維主謀並屠正祖  
賄買頂兇各情皆由洪萬淋供扳在先照供牽  
控尚非平空誣陷惟糾衆將梁萬和等細毆勒  
寫票據並將梁萬昌砍傷情同擾害姑念該犯

之弟已死非命不無一線可原蘇萬全應於兇惡棍徒生事擾害擬軍例上量減一等杖一百徒三年梁萬和蘇萬全均發配折責安置賈正宏先曾出名立票繼復被邀同往應與在場並不理阻之陸珍侯均照不應重律杖八十岳可維訊未主謀惟談論行兇案情致洪萬淋妄供牽訟亦屬多事應照不應輕律笞四十賈正宏係監生照例納贖陸珍侯等分別折責發落梁

萬和捐監實收追出繳銷梁萬昌原報被刼措  
詞失實亦屬非是第事出有因且畏懼蘇萬全  
不敢指告情尚可原應與訊永同行之屠殿元  
均與免議差役于相等究無賄囑情弊應毋庸  
議票據塗銷蘇萬全京詞牽敘岳可維包誣訟  
搶之案久已訊結無庸再議其蘇萬全牛車踐  
踏梁萬和麥地爭控及梁萬和糾搶陳高氏未  
結等案現在人證未齊應發回該縣就近訊明

詳結以免提省拖累兇器刀鎗等件隨招解驗  
案結飭銷魚鰓錢文已經分散各漁戶且為數  
無多免其追繳除將供冊咨部外所有審明定  
擬緣由理合恭摺具

奏奉

硃批刑部議奏

特叅驗審草率偏執原詳知縣疏

奏為特叅驗審草率偏執原詳之知縣請

旨解任質審以成信讞仰祈

聖鑒事竊照知縣一官職司民命遇有報驗事件必

須確核屍傷虛衷推究方足以昭詳慎而免枉

縱詎有豐縣知縣德豐者先據通詳該縣民婦

任趙氏因夫姪任魁行竊山東金鄉縣事主劉

廷清等家案內遞籍追賊後復竊鄰村邵姓衣



物致被毆傷回家該氏因其屢次為匪玷辱祖宗起意邀同任魁之堂叔祖任敬將任魁用蘆蓆包紮復邀同其族叔任謙族兄任小貞幫同將任魁活埋身死等情經臬司林則徐以任趙氏年逾七十任敬年逾八十何能將任魁用蘆蓆包捲用繩網縛而任魁亦竟任聽包縛絕不掙扎喊叫案多疑竇駁飭確審嗣德豐仍照原詳情節將任趙氏審依期親尊長毆死積憤為

匪卑幼因玷辱祖宗起見忿激致斃者無論謀  
故於毆殺本律上減一等例杖一百徒三年照  
律收贖任敬任謙任小貞各照餘人律杖一百  
將任趙氏議擬解府該府余穎達查核案情仍  
多未確駁提全案犯證解郡飭委銅山縣高攀  
桂會同研審供情支離邵姓事主屢傳未到經  
該府親提研鞫始據任趙氏等供出此案所指  
邵姓本名邵興因任魁與邵興少子邵全素有

雞姦邵全曾將皮套褲借給共穿嗣任魁復圖  
姦邵全之妻邵全因此挾嫌向任魁索還套褲  
被任魁斥罵無情掌批其頰邵全愈忿隨於道  
光三年四月初七日同父邵興並邵玉邵順及  
工人岳鬼子將任魁誘出共毆因傷身死任趙  
氏與任敬等並地保受賄私埋匿報該縣訪聞  
差拘任敬畏罪串囑任趙氏等將姦情捏作竊  
情藉稱屢次為匪致被毆傷忿激私埋不認受

賄並故匿邵興等之名稱為邵姓冀圖掩飾惟  
原報活埋一層訊據任趙氏等僉供實係死後  
擡埋並無活埋情事因該縣創驗屍身見項頸  
右邊有擡擦繩痕二道白色內畧帶微紅口鼻  
竅中微有沙泥兼以任魁如係死後包擦擡埋  
何以右臂膊拳曲在外自係活埋所致再三追  
究任趙氏等畏刑混認質之件作侯昌亦稱原  
驗屍身本不似活埋形狀各等情惟該縣德豐

堅稱實係活埋始終罔執節經勒拏邵全等犯  
業經遠颺若非啟檢屍傷則罪名出入攸關難  
憑定擬臣等查核該縣德豐驗審民命草率填  
報偏執具詳於指姦為竊賄串各情漫不加察  
聽兇犯改為事主有名諱作無名以致犯證在  
逃實屬玩視民命並恐有偏聽故縱情弊據該  
管道府查明揭報由藩司張志緒署臬司王賡  
言詳請叅

奏前來相應請

旨將豐縣知縣德豐解任以便提集犯證質訊明確  
分別叅辦以歸核實除飭勒掣逸犯邵全等務  
獲究報一面飭委幹員馳往啟檢詳辦並委員  
接署豐縣印務查明德豐任內經手一切倉庫  
錢糧有無未清事件另行辦理外臣等謹合詞  
恭摺具

奏伏乞

皇上聖鑒訓示

請動欸修辦海口椿柵疏

奏為勘估海口椿柵動欸修辦循例奏祈

聖鑒事據署蘇州布政使林則徐詳稱據太倉州知  
州張作楠詳報該州統轄沿海花埠浪港蕩茜  
錢涇新涇五處海口椿柵上屆係於嘉慶十八  
年動項修釘歷今十載有餘地居沿海風潮搖  
撼致多損壞漂失已逾固限亟應修理飭據該  
州親詣勘明實緣賊潮漫擊年深朽爛應行釘



堵新橋估需工料銀四百五十九兩零應請循  
例在於司庫耗羨項下給辦等情詳請具

奏前來臣等查動支司庫耗羨存公銀兩修建工  
程無論銀數多寡例應具

奏今太倉州境內花埠浪港蕩茜錢涇新涇五處  
海口橋柵風潮搖撼損壞漂失亟應修理飭據  
該州知州張作楠親詣勘明實係年深朽爛必  
須釘堵新橋估需工料銀四百五十九兩零應

請循例准於司庫耗羨項下動給趕修以資保  
護仍俟工竣委驗明確另取實用冊結報銷理  
合循例恭摺具

奏伏乞

皇上聖鑒奉

硃批轉行遵照

請以故河臣入祀名宦疏

奏為地方紳耆請以前故河臣入祀名宦並愿捐

建專祠據情代陳仰祈

聖鑒事竊查前河臣黎世序在任病故仰蒙

皇上軫念忠勤

恩加贈卹既邀易名

盛典復

命入祀賢良

恩禮優隆實所罕覩不特黎世序哀榮備甚銜結九  
原卽凡在臣民亦莫不觀感興起有發於情不  
自己者前據清河縣紳耆丁如玉等聯名赴臣  
等衙門呈稱南河故督黎世序自嘉慶十七年  
奉

命督河忠清亮節沐雨櫛風其忠謀至計奠安河湖  
節

帑庇民堪垂法則均已仰邀

聖主明鑒

異數頻加惟如玉等生長此土近隸編氓追思功德  
在民咸深哀感緣清邑地當河淮要衝時瀕危  
險自黎故院興築圍堰增培遙堤俾南北兩岸  
咸臻鞏固民獲乂安而且遇災捐賑重修學校  
以養以教有幹有年念樂利之蒙庥思馨香以  
報德維茲嘉浦神所憑依粵稽古典宜修祀事  
伏乞據情上達邀請入祀清河縣學名宦並懇

俯准紳耆等捐建專祠俾伸感慕以垂久遠等情具呈前來臣等伏稽往事

國朝河臣功業顯著者如靳輔齊蘇勒稭曾筠高斌均入祀名宦並建專祠載在祀典今黎世序宣力河防安瀾著績而且保衛民居畱心學校裨益宏多前徵克紹該紳等請修祀典羣情踴躍臣等訪察輿情實出至誠不敢壅於上

聞除入祀名宦應令地方官開造事實清冊循例詳

題辦理外所有閭邑紳耆愿建專祠之處合無仰  
懇

聖恩俯俞所請准其擇地建立俾展感慕而申誠悃  
洵足為遺愛在民之勸謹會同江蘇學政臣周  
系英合詞恭摺具

奏伏乞

皇上聖鑒訓示

籌辦三吳水利疏

再三吳水利為東南財賦攸關本年夏秋靈潦  
異漲雖非常有之事然積水泛溢江浙大郡悉  
遭水患實由太湖分洩水道年久淤墊去路不  
暢所致查太湖跨江浙蘇常湖三郡周圍數百  
里凡杭嘉湖宣歙諸路之水無不匯歸太湖三  
江分趨於海三江形勢在太湖東北為劉河卽  
古之婁江東南由黃浦入海者為東江其中卽



為吳淞江蘇郡居太湖西北其水道一向東南  
流通吳江震澤以趨劉河一向北流通常熟昭  
文兩縣分入白茆七鴉口福山口歸海自乾隆  
二十八年大加疏浚之後劉河吳淞白茆雖曾  
先後興挑然未窮源竟委逐節疏通每遇雨少  
之年海潮挾沙往來清弱不能暢出滌沙日漸  
淤墊其間河港泖蕩潴水之區非日久為茭草  
湮塞卽為趨利姦民占築圍補致多阻格旱則

水不通流灌漑難資潦則諸水滙於太湖僅藉  
一線吳淞為去路勢不能不泛溢為患數郡士  
民莫不延頸跂踵仰望大加浚治維時水勢汪  
洋無從查勘措手臣等深恐積水難消二麥不  
能佈種難以安定人心察看情形惟劉河一支  
分洩較為切近先將前此疏河餘剩銀欸飭令  
松太道龔麗正提交太倉州張作楠就該河淺  
處抽溝疏導加以天時連晴數月積水漸消高

田均得涸種而低窪之區猶未盡乾涸則以三江尾閭未暢太湖水勢尚旺故也設今不治則湖面未能騰空一遇夏秋水發實為可慮但地連數郡欲加挑疏非周歷確勘深悉形勢無從措手施工江蘇兩屬地方官各有應辦事件亦少諳悉河務之人查有因公降調原任淮海道沈惇彝因有銷筭事宜自浙江原籍赴浦該道老成廉幹熟諳河務臣等商定河臣黎世序於

其事竣調派來蘇會同松太道歷勘大概形勢  
三江白茆間段淤淺處甚多皆宜挑浚設開啟  
閉使蓄洩有方旱潦有備以收久效若僅圖目  
前水利旋疏旋淤徒滋勞費於事無益臣等查  
江浙東南數郡為

國家財賦之區水利不修一遇旱潦歉收不但歲額  
蠲緩兼需發帑賑貸得失判然第工鉅費繁籌  
辦非易必須再加確切估計通盤打算措置有

方始可縷析條分據實上陳恭候

聖裁臣等受

恩深重固不敢輕率興動難圖厥成亦不敢畏難苟  
安坐致貽誤現與司道府州悉心商榷並咨浙  
江撫臣一體查議博採衆論集思廣益籌措經  
費分年次第興辦期於

國計民生稍裨萬一容俟得有成議另行詳晰陳  
奏請

旨遵行謹先附片奏

聞奉

硃批通省水利攸關甚鉅豈有坐令貽悞之理當隨時相度計出萬全方為克稱職守然要在得有實效勿徒費周章也悉心查勘妥議具奏詳慎行之

請豁部駁銀欸疏

奏為江蘇省前辦二次清查請豁部駁銀欸查與  
恩詔准豁條款相符循案奏懇

聖恩豁免以昭畫一而歸核實事竊據江寧布政使  
張志緒署蘇州布政使誠端各詳稱江寧等屬  
上屆二次清查案內舊虧抵墊未補銀兩內除  
咨追應聽他省查辦及官虧抵墊有著等項外  
實未完銀四十八萬三千三百六十三兩零未

三千六百八十九石零蘇州等屬實未完銀八  
十四萬四千三百二十三兩零米豆一千二百  
九十八石零均核與

恩詔准豁條款相符經詳奉咨准部覆除核明

恩詔豁免條款相符者奏明豁免行文銷案外其餘  
止有縣名並無員名及各該員存歿並

恩詔以前有無結報案據未據聲敘等因當查奉駁  
各款江寧等屬共計未豁銀一十四萬二千三



百一十六兩零米三千六百八十九石零蘇州  
等屬共計未豁銀五十二萬五千七百六十四  
兩零內除原任蘇屬各員現任他省及丁憂回  
籍有官可補並查抄原籍房屋抵繳庫項各欸  
共銀二萬一千二百九十八兩零應分咨各省  
追繳報撥原缺蘇省庫項仍由蘇省彙案登銷  
外實未豁銀五十萬四千四百六十六兩零均  
遵奉部飭逐一聲敘開造登覆欸冊詳咨奉部

奏明道光二年十二月封印截止之後查覆  
且係截止時未經准豁之欸未便歸於

恩詔豁免之內應飭查照各原案一體着追等因復  
查未完各欸原於道光元年八月內詳經咨部  
請豁迨三年正月方奉部文行查是豁免追贓  
銀兩雖蒙

奏明於二年十二月封印日為止但請豁原案實  
係元年八月內詳咨且奉查各欸業將員名及

存歿並結報有案之處一一聲明其定案追賠實在

恩詔以前悉與准豁條款相符並無舊欠新虧牽混之弊今若遵奉部議查照原案一體着追不特原官均多事故徒事追呼有名無實而以

恩詔應免之欸因前未分晰聲敘致未能共邀恩豁亦屬向隅况查道光三年安徽省具

奏官墊民欠分別辦理一摺經戶部議覆分別免

其著追亦在二年十二月封印截數以後今江蘇各屬事同一律詳請

奏懇

聖恩豁免以廣

皇仁而省滋累等情前來臣查江蘇各屬前辦二次清查未完請豁各款銀兩咨准部駁江寧等屬未豁銀一十四萬二千三百一十六兩零米三千六百八十九石零蘇州等屬未豁銀五十萬

四千四百六十六兩零現據江蘇兩藩司查明  
請豁各欸定案追賠實在

恩詔以前悉與准豁條欸相符若遵部議查照原案  
着追不特原官均多事故徒事追呼有名無實  
且道光三年安徽省具

奏官墊民欠分別辦理一摺亦在二年十二月封  
印截數以後業經戶部議覆奏奉

恩旨免追在案江蘇省事同一律經該司等循案詳

請具

奏臣覆核無異所有請豁各款理合開列清單恭  
呈

御覽合無仰懇

皇上天恩俯准一體豁免以符

恩詔而示同仁謹會同協辦大學士兩江總督臣孫

玉庭恭摺具

奏伏乞

皇上聖鑒奉

硃批戶部查核具奏

清單

謹將江蘇省各屬前辦二次清查未完請豁部  
駁各欸銀兩開列清單恭呈

御覽

計開

江蘇等屬

一山陽桃源安東三縣上屆初次清查案內抵  
墊未補銀共六千二百九十九兩二分四釐



初辦清查時已成無着歸於現任代賠歸補核與

恩詔內部議條款凡分賠代賠之項一概豁免之條相符

一虧缺無着項下前任句容縣已故知縣方菁等十一員共應追虧缺銀四萬三千二百六十八兩九錢一分九釐俱於

恩詔以前查明產盡無完歸於無着項下調劑及責

成後任代賠核與

恩詔內部議條款本員無完事非經手人非同案分  
賠代賠豁免之條相符

一嘉慶十四年以前墊完民欠銀五萬二千二百六十四兩一錢一分四釐米三千六百八十九石五斗一升五合七勺又書役欠款攤賠銀二萬九百八十四兩八錢三分又前任寶應縣已故知縣方恩承等四員應賠墊解

民欠各欸共銀二千六百四十二兩五錢一  
釐以上三欸內如墊完銀米因民欠奉豁無  
可着追責令經墊之員賠補書役欠逃亡故  
絕無可追補在於經墊之員名下追賠核與  
恩詔內部議條款凡民佃書役欠欸無着在於經管  
各員名下代賠者一概豁免之條相符

一江寧等十州縣攤捐無着等銀一萬六千八  
百五十六兩九錢九釐係原抵應領續因核

減不准請領或本案攤廉代扣未完無着核與

恩詔內部議條款凡因公核減攤捐代賠一概豁免之條相符

以上共請豁銀一十四萬二千三百一十六兩二錢九分七釐米三千六百八十九石五斗一升五合七勺

蘇州等屬

一各州縣節省彌補無着補剩未完銀二十三萬九千五百二十四兩三錢六分七釐均係接收前任原虧非人亡產盡卽官叅籍沒因而現任為之彌補核與

恩詔內部議條款事非經手人非同案豁免之條相符

一各屬攤賠嘉慶十四年以前墊完民欠銀一十七萬六千二十兩四錢二分二釐原係列

入二次清查追補嗣緣嘉慶二十二年以前  
積年民欠奉豁無徵因而查照

廷議章程按成分賠攤之於官實係官代民賠與  
案外嘉慶十五年以後至二十二年之官墊  
民欠並無二致今案外攤賠民欠已奉邀免  
所有前項官代民賠事同一律且核與原奉  
部議書役民佃等無着欠項例得查辦豁免  
之條相符

一無官可補之前署陽湖縣已故知縣畢開煜  
鄧文鏡李紹洛等三員未完官欠銀八萬八  
千九百二十一兩五錢八分二釐實係因公  
挪缺業經請咨各原籍訊取隣保戶族人等  
實無家產亦無資財隱寄具結覆蘇並又確  
查原籍無家可訊之鄧文鏡一員係寄寓丹  
徒縣行據該縣結報實係家產盡絕無可着  
追專案詳請咨覆在案現在畢開煜鄧文鏡

兩員已經物故李紹洛一員病廢罷職均係  
赤貧無追與原奉部議本人挪移應行查辦  
之條相符其結報雖在

恩詔以後而欸項實在

恩詔以前應請仍照挪移條欸查辦請豁

以上共豁銀五十萬四千四百六十六兩三錢  
七分一釐奉

硃批覽



查勘吳淞運道疏

奏為吳淞運道遵

旨詳查妥議據實覆奏仰祈

聖鑒事竊照吳淞江為漕運經由要津前因間有淤  
淺仿照成案請將重運改由黃浦泖湖行走以  
期妥速惟查吳淞江於嘉慶二十四年挑浚甫  
經四載因何復有淺阻之處是否來源不旺未  
能通暢抑係原挑不實必須再加疏濬另飭履

勘妥辦等因奏奉

硃批詳查妥議不可稍有浮冒不實之處欽此臣等  
伏查吳淞為禹三江之一上承太湖之水由湖  
歸江由江入海不但為重運商船往來要道且  
關係蘇州松江太倉三府州屬之農田水利實  
非細故嘉慶二十一年前撫臣胡克家勘估興  
挑民捐民辦需銀二十八萬三千兩零歸沿河  
州縣按歲徵糧額分作兩年攤捐於二十三年

捐足興工民間自為經理二十四年二月工竣  
歷二十五年道光元年並無淤滯農商稱便節  
經

奏明有案其復有淺阻之故臣等再三推究察訪  
輿情道光二年秋冬雨澤稀少各處河道積水  
皆小來源不旺海潮挾沙而進清水無力刷滌  
以致漸形淤淺未能通暢適值重運趲行之際  
不得不改由黃浦泖湖行走據實奏

聞維時實在情形僅止間段有淺漕船未能一律通行迥非嘉慶二十三年未挑以前淤塞幾成平陸者可比本年夏秋雨水盛漲現當深冬水退之後據該司道等稟稱測量底水尚自三四尺至丈餘不等並非原挑不實臣文綺親詣察勘悉與所稟相符惟是吳淞居三江之中承太湖之水經崑山嘉定青浦上海四縣以趨於海今年太湖水勢甚旺是以吳淞積水猶深第來源

弱旺靡定難以目前勘測為準利漕速運籌策  
宜周臣等查上海南匯川沙三縣廳糧艘自嘉  
慶二十一二三等年暨本年前後凡五運改道  
黃浦泖湖並無風水之虞其吳淞一帶歷年行  
走亦屬穩便相應議明具

奏嗣後准令該司道臨時相度兩路俱可行走勘  
吳淞消長之情形以定該三縣廳漕舡趨行之  
路免致逐年臨事再

恭壽堂奏議

卷六

五

奏庶歸簡易而成便益謹合詞恭摺具

奏伏乞

皇上聖鑒訓示

興修三吳水利疏

奏為勘明三吳水利酌分先後興修恭摺奏懇

聖恩借項辦理以疏壅滯而衛民生事竊臣等前將

江蘇省應辦水利事宜附片會陳欽奉

硃批通省水利攸關甚鉅豈有坐令貽悞之理必當隨時相度計出萬全方為克稱職守然要在得有實效勿徒費周章也悉心查勘妥議具奏詳慎行之欽此仰見

皇上念切勤民工期實濟臣等跪誦之下欽服難名  
當經飭據蘇松太道龔麗正會同調派勘估之  
原任淮海道沈惇彝督同太倉州知州張作楠  
及該管府州縣等遍歷各屬水道確勘情形酌  
籌辦法並由藩臬兩司會議分別緩急稟辦前  
來臣孫玉庭曾經

奏明於校閱蘇松營伍之便順道查勘吳淞江劉  
河等處臣韓文綺亦卽親往江震下游一帶周



歷泖湖浦港逐加看視伏查江浙之水以太湖  
為巨浸延袤數百里承納杭嘉湖宣歙諸路來  
源禹貢所謂震澤周禮所謂具區是也太湖之  
水奔赴而東則必由運河以達江由三江以注  
大海其間又有支河汊港湖蕩浦塘為之次第  
傳送必使節節通暢派別源流則來者可容去  
者無阻然後無泛溢之害而有灌溉之利古之  
稱三江者曰東江曰吳淞江曰婁江迨後東江

失其故道遂以江震下流澱泖一帶歸於黃浦  
江之水當之此東南入海之路也吳淞西承江  
震運道東會黃浦尾閭此居中入海之路也婁  
江卽今之劉河坐落太倉州境此東北入海之  
路也婁江之北又有白茆河坐落常熟昭文縣  
境分承蘇屬之長元吳常屬之江陰無錫諸水  
下注楊子江尾入海此又於三江之外別為一  
大支者也以上四者皆太湖所由歸海之要道

未便闕一不治惟是一時並治工鉅費繁蓋總  
道雖只四條而港汊不啻百出水之行於地下  
猶血脈之行於人身一節未通卽百節因而受  
病試以大端言之如治東江則凡在黃浦上游  
自太湖邊之牛芽墩浪打穿唐家湖一帶及運  
河諸港並入泖出泖凡歸黃浦各水道均應逐  
節疎通而大泖圓泖長泖多已成為蕩田淤塞  
尤甚小民惑於近利但冀目前之水可變為田

不知他日之田悉淪於水今為全局而計不可  
不挑挖寬深以除阻遏也治吳淞江則自江震  
境內之十七橋十八港起並瓜涇港寶帶橋兩  
路均為湖水入淞之咽喉而港身多屬蘆灘橋  
洞半皆積土下及龐山湖大斜港一帶蘆蕩尤  
多其自青浦之四江口以迄上海之萬安渡幹  
河既須大挑支河亦須遍濬也治婁江則自鮎  
魚口胥口銅坑口之沿湖蘆灘及木瀆市河蘇

州城河並崑新大鎮沿城河道均須擇要挑撈  
其自半涇灣以至海口雖經上年捐辦抽溝而  
未能寬展尚須大加開挖使之通暢也至白茆  
一河上流不甚淺塞自渡船橋以東幾至淤成  
平陸惟挑濬寬深俾有建瓴之勢始足以資宣  
洩也又凡江尾入海之處必有海潮往來來則  
挾沙去則淤墊昔人云每一潮約淤一錢之厚  
以一日兩潮計之經年累月卽已不勝其淤故

前人之治三江必先修建閘座潮來則下版以禦之潮去則啟版以刷之亦猶河工蓄清敵黃之意從前吳淞江劉河皆有石閘白茆亦有滾水壩近惟劉河之閘修理較易其餘皆已廢壞漫無關束溯查乾隆二十八年修濬三江水利一次祇就彼時現存閘座為之經理迨嘉慶二十三年吳淞江雖曾重濬而閘座已壞未議修建是以逐漸灌淤江身仍復淺窄今欲為久遠

之計不惟切攤挑浚務在寬深且須建閘禦潮  
以時應閉凡此皆導湖入江入海之辦法也若  
論一勞永逸之計原應全工統辦一氣呵成所  
以不敢遽議者則以

國家費有常經而閭閻力有未裕耳然東南財賦  
所出若不設法籌辦一遇旱潦為災不但蠲緩  
額糧且須發帑賑貸何以上紓

國計下裨民生臣等再四會商惟有於各條水道

之中擇其除害尤急需費較輕者先行修治其餘分年興辦庶工用可期湊手查吳淞江係太湖正派理應先辦然工段最為綿長而閘座又須重建據委員約估挑挖土方又建閘工料幾及四十萬兩其劉河白茆亦據分段約估合計兩處所費較之吳淞一處僅多萬餘兩但劉河稍偏於北而白茆更在北隅論地勢皆南下北高論水性則去高就下上年蘇州府屬被水之



處常昭二邑較崑新江震為輕盖由沿江皆有  
間身高於平地故也今權其勢之緩急則白茆  
劉河祇可暫緩而酌其費之重輕則吳江亦不  
得不緩臣等督同司道及府州縣相度機宜惟  
有將太湖下注黃浦之一路先行挑濬緣該處  
地勢偏於東南為江震二邑下流上年該二邑  
被水最重至今尚有未涸之田亟須謀為宣洩  
且黃浦最為深暢因其勢而導之即為眾水之

所爭趨並浙省杭嘉湖之水亦皆得有歸宿據  
委員所估約需十五六萬兩經費較為節省臣  
等擬將此段水道卽於今年先辦其吳淞劉河  
白茆等處請俟明後兩年以次挑淤建閘務期  
一律深通不使有草率將就之弊此又臣等審  
度時勢酌分先後辦理情形也至此項經費查  
乾隆二十八年成案係先借

帑給辦按田畝徵還伏思事關水利農田本應民

捐民辦惟是上年被災之後民力拮据疊蒙

恩旨下頒正供尚在蠲緩似此工繁費鉅自難先事

鳩資我

皇上軫念民依有加無已臣等仰體

聖意惟有循照成案懇

恩借帑興辦仍於工竣後按照得沾水利之州縣分  
年攤徵還欸查江寧江蘇兩藩庫各有封貯銀  
四十八萬兩原備本省緊要公用今三吳水利

事係要需似應於該款內借動惟查辦理災賑  
各案已將封貯銀兩陸續

奏明借撥多未歸還是以江寧捐監案內奉

旨收足五萬兩先行解部續收足五萬兩歸補封貯

而蘇藩庫復開捐監案內先以籌辦直隸水利

概令解京繼又奉准部行即將此款歸補封貯

臣韓文綺於本年二月分奏報監銀片內聲明

江寧收捐一十萬三百五十兩江蘇收捐五萬

兩應續解部備撥今臣等復思本省應辦水利攸關甚鉅而所擬借動之封貯本款一時尚少實存合無仰懇

皇上天恩將前項奏報監銀共一十五萬三百五十兩先准畱於本省提歸封貯款內以充本年辦理東江一路水利之用並請此後兩藩庫續收捐監銀兩概令暫緩解部儘數提還封貯之款卽於該款內陸續墊給水利經費以便分年挑

濬俟封貯原數補足仍將監銀全行解京其按  
畝攤徵之銀如何酌量分數何時攤起何時徵  
完容再察看輿情

奏明定議如此一轉移間於要工大有裨益而東  
南民力可以就紓益當頂頌

皇仁同歌樂利如蒙

俞允臣等再飭該司道等先將本年應辦工段方價  
確加細估開具銀數清單縷晰核

奏一俟冬令水落卽行興工其餘分年工段亦隨時估計

奏辦總期工歸實用不使稍有虛浮並遴派廉能熟練之員分投承辦明立賞罰章程其奮勉妥速者分別存記事竣量請

恩施如草率遲延或查有偷減立即嚴叅懲治不敢稍事姑容至疏展河道或逢灣切嘴或剝灘抽渠因而挑挖民田勢有難已其陞科者查明豁

賦酌給墾資私佔者勒限剷除如違究辦臣等  
益當殫竭愚誠任勞任怨恪遵

批諭詳慎籌辦不敢徒費周章俾東南財賦之區害  
去利興以仰副

宵旰勤求於萬一所有勘議先後借款辦理緣由謹  
合詞恭摺具

奏並繪圖說恭呈

御覽伏乞



皇上聖鑒訓示

截停浙省幫船興工徒陽運河疏

奏為浙省回空幫舡因江口河道淺阻循案截停  
先將徒陽運河煞壩興挑並勘估工段銀數恭  
摺奏請

聖鑒事竊照鎮江府屬丹徒丹陽二縣運河為江浙  
兩省漕舡經由要道該處河身窄狹水無來源  
全藉江湖灌注用資浮送每日潮汐挾沙而行  
水去沙停易致淺淤定例於每年回空過竣後

擇淺挑撈屆六年大挑一次以利重運本年輪  
屆小挑節飭沿河文武員弁將江浙回空各幫  
加緊催趲以便如期煞壩惟緣本年夏秋多雨  
江潮異漲該處當朝夕消長之區水盛沙多積  
淤厚於往歲在前之蘇松各幫尚無阻滯迨冬  
深潮弱節露淺灘經臣嚴飭道府縣竭力疏濬  
集夫牽拉並咨會漕臣飭令該備弁嚴押幫丁  
將土宜等物盡數起撥時值小汛期內有已進

京口之浙省幫舡一百六十餘隻壅滯猪婆灘  
一帶復籌令設法推拽車水倒灌幸值南風凍  
解口內各船於十二月十五日全行趲過猪婆  
灘跟踪歸次卽於是日將江口大壩堵築其尚  
未進口幫舡一百七十餘隻循照嘉慶十四十  
九二十四等年成案截停壩外俟挑工完竣啟  
壩後先行催提進口兩無延誤並據署常鎮道  
錢俊鎮江府羅綺詳報督同丹徒丹陽兩縣逐

段測量勘得丹徒境內自江口起至丹徒橋上  
止河長三千七百五十五丈又自營房起至越  
河閘上止河長六百五十丈逐段淤淺應請煞  
壩開挑又江口壩外淤灘一段挺入河心又鴨  
蛋行至猪婆灘小埒下等共十四處各段內南  
北兩岸俱有陽灘共長五百丈應於挑工之外  
統行估勘又壩外淤灘難以築壩興挑應同零  
星淺澁之東壩等十七處共長一千三百三十

丈俱應一律估撈統計挑撈切灘築壩及修換  
各閘板繩索等項共估需銀一萬四千二百四  
兩一錢零又丹陽境內旱缺口起至張官渡上  
河長九百丈又觀音山起至馬棚下河長八百  
丈水多淤淺均應熬壩開挑又馬橋對岸等三  
處俱有陽灘共長五十五丈應行估砌又定山  
灣等二十處共長九百四十丈間段淺澁應行  
估計需銀四千八百四十五兩七錢零合計該

兩縣各工通共估銀一萬九千四十九兩九錢  
零向應動支之丹徒縣樂生洲租息現已蠲緩  
無徵該藩司請於司庫存公鹽規及武職空缺  
等欸銀內動給趕辦等情具詳前來臣卽於十  
二月二十二日自蘇起程前赴鎮江查勘應挑  
應撈工段均與道府等估報相符復將原估各  
段丈尺逐一標立誌樁加封灰印以杜偷減之  
弊並責成該道府親駐工所嚴督各工員趕緊

挑撈勒限於來歲正月內全行蒧事仍於工竣  
未啟壩三日前先行稟明屆期臣親往驗收如  
查出挑撈寬深丈尺與原估標誌不符卽當據  
實叅辦務期一律深通以利重運其未進口之  
幫舡一百七十餘隻卽截畱牌灣一帶飭令該  
處營縣妥為彈壓照料俟開壩後首先催促進  
口南下再令江浙重運挨次出江查來年遇閏  
且各幫又有減運之舡不虞遲誤除查取土方



夫工細冊另行分別具

題咨部外所有循案截停浙省幫船先行煞壩興  
挑並勘估工段銀數各緣由謹會同協辦大學  
士兩江總督臣孫玉庭合詞恭摺具

奏伏乞

皇上聖鑒奉

硃批知道了

審明劣衿創刊鄉規惑衆斂錢疏

奏為審明劣衿創刊鄉規惑衆斂錢各犯分別定  
擬恭摺奏祈

聖鑒事竊照句容縣劣衿于先庚等創立鄉規刊刻  
成書播弄鄉愚散布斂錢一案先經臣等將查  
拏獲犯提審緣由具

奏欽奉

硃批所辦俱是知道了欽此遵卽札行江寧藩司督

府審解去後茲據該司張志緒督同道銜江寧  
府知府余需元等審擬詳解前來臣孫玉庭親  
提審鞫緣于先庚卽于星垣夏以松篴瑞庭均  
係句容縣學文生王德昭卽王兆祥戴錦山係  
屬民人王德昭先於嘉慶二十四年聽從在逃  
之胡萬年扒毀張金召房屋罪應擬徒援  
赦免緝復因京控擬杖援

赦寬免該縣漕倉建在龍潭地方向有各鄉糧戶於

附近官倉蓋造民廩以備貯米聽候解收兼有  
無廩圖分須向他圖租賃存貯于先庚以為不  
便又見倉基低窪久未修理起意托詞改造倉  
廩約齊各鄉圖糧長設局派捐藉圖斂錢肥己  
恐衆人不依將地方公事創議規條刊刻成書  
按圖分散並建造

### 皇亭

龍牌欲待開倉之時擡赴龍潭冀乘各鄉糧戶齊集

易於號召兼可挾制官長隨於三年二月初間  
與王德昭夏以松筴瑞庭及逸犯胡萬年商定  
卽寫傳單令在逃之張餘成茅正英分赴各鄉  
傳知衆糧長訂於二十八日齊集其家議事屆  
期王德昭戴錦山夏義友王恒興卽王世理及  
在逃之吳啟璉許麗元茅正英章錦武張泰申  
張餘三王秉周桂雲海筴其昌王茂書秦淮賢  
等齊至于先庚家于先庚聲言地方一切公事

現須議定鄉規刊板刷印分散各鄉圖一體遵辦並造牌亭及演戲豎碑等事需費不貲應照通縣漕糧派令糧戶每石出錢三十文計可得錢一千餘千文以作經費當議設局在小花山于先庚家祠內于先庚與伊兄于元福及王德昭吳啟璉在局辦事許麗元專管賬目戴錦山與胡萬年章錦武亦常赴局照應所派錢文責成各圖糧長轉向糧戶按米派捐收錢送局于

先庚隨創立鄉規五十六條議以每年兩鄉輪流為首每鄉各派董事四人通十六鄉共六十四人永遠在局分作八班各派執事每年十六鄉會合三次名會大鄉每鄉十三圖亦會三次名曰會小鄉限以時刻遲則公罰會合大鄉每次每人派出錢二百文小鄉減半如局內有事需費各圖不到欠一罰一其餘各條皆以地方公事為名藉端科斂意在侵蝕把持尚無違悖

字句于先庚做就底稿送交夏以松商定並誤  
序一篇並送給錢布酬勞隨又抄錄徵漕例禁  
厯奉

上諭部文及訟案呈詞列於規條之前後列各圖坐  
落村莊及董事姓名分作四卷並自作序列於  
卷首偕同吳啟璉攜帶原稿交素業印書之張  
陞太包為刻印言明先印五百部給紙工價錢  
一百五十千文張陞太轉交刻字匠洪四刊板



九十塊刷就存貯俟付工價給散于先庚於三月初八日會合大鄉卽於初十日令豎瑞庭與各鄉董事聯名赴縣具呈請修倉廩希冀批准另行科派因被批駁停止未辦四月初十日于先庚又會大鄉催取各處派捐錢文隨經戴錦山與夏義友王恒興倪繼立王玉山等各向各圖糧戶照米派錢陸續送局于先庚共斂得錢四百八千八百文洋錢四十七元先付張陞太

刻書工價銀八十一兩六錢並雕造牌亭用去  
錢一百二十餘千餘錢皆入私橐侵用未將所  
刊鄉規取回分散以致衆心不服王德昭隨起  
意乘機另行設局私向吳啟璉許麗元茅正英  
張餘成胡萬年章錦武等於七月初九日至邵  
家邊祠內傳齊各鄉糧戶將于先庚斂錢侵用  
情由向衆告知卽議另在該祠設局旋卽措錢  
五十餘千交吳啟璉帶往找清張陞太刻書工

價將于先庚所定刷印鄉規五百部並添印二十部取交王德昭並將板片寄存在省開張鞋店之句客人唐榮昇店內王德昭隨將鄉規按圖分散先後斂收錢二百八十餘千花用時值于先庚外出伊兄于元福聞知通信于先庚趕回速發傳單約會各鄉至小花山局內公議眾俱來到于先庚情急央出夏以松調處訂於九月二十二日在縣城會茶評理于先庚隨邀約

笄瑞庭戴錦山夏義友王玉山王恒興卽王世  
禮倪繼立殷文起陳學書魏陞元巫萬年先期  
進城適奉訪拏該縣陳玉成亦有風聞於二十  
一日夜督同典史帶領差役及儒學門斗將于  
先庚等十二名拏獲並起獲所刊鄉規解省卽  
經飭府審辦旋據該府訪明該犯等寄存鄉規  
板片所在密委署南捕通判劉大烈帶役起獲  
提犯研訊內有殷文起陳學書魏陞元三名供

卷一百一十五  
二  
係各圖糧長並未聽從勒派巫萬年一犯本係  
著名訟棍惟於于先庚創刻鄉規之事供不知  
情其另行設局斂錢之王德昭為案內要犯聞  
風逃避稟經飭縣緝獲解省歸案審辦嗣筭瑞  
庭患病提禁外監身故委據上元縣陳道坦驗  
訊通報飭就現犯審擬解勘臣孫玉庭就近親  
提犯證到案逐加研訊據各供認前情不諱嚴  
究于先庚王德昭據供實係假托地方公事刊

刻條規希圖挾制斂錢並無違悖不法所斂錢  
文實止此數夏以松曾得受酬謝錢布餘犯皆  
未分贓再三究詰矢口不移案無遁飾查例載  
假以建言為由挾制官府軍民人等皆發附近  
充軍又名例律載斷罪無正條援引他律比附  
加減定擬各等語此案于先庚首借地方公事  
設局創議鄉規刊刻成書散布斂錢得贓四百  
餘千已屬欺詐鄉愚且復建造牌亭欲俟該縣

開倉徵漕之時擡赴龍潭以便號召鄉民挾制  
官長實屬苛斂惑衆膽大妄為洵為衿棍之尤  
若僅依詐欺官私取財計贓罪止滿流卽依建  
言挾制官府例問發附近充軍亦屬情浮於法  
自應比例加等定擬已革文生于先庚除計贓  
罪應滿流輕罪不議外應請比照假以建言為  
由挾制官府發附近充軍例從重改發新疆酌  
撥種地當差以示懲創係生員照例免刺王德

昭卽王兆祥始則聽從于先庚創議斂錢繼復  
勾串吳啟璉等另行設局將所刊鄉規取回散  
給得錢花用未便仍照為從科斷應卽比照建  
言挾制例擬發附近充軍該犯本係在逃徒犯  
援

赦免緝今復犯法應加一等改發近邊充軍至配所  
杖一百折責安置已革生員夏以松卽夏維一  
為于先庚商定鄉規底稿並謾序文得受謝錢



笄瑞庭聽從于先庚假托請修倉廩希圖斂錢  
分肥戴錦山在局附和幫辦均屬為從應於于  
先庚遣罪上減一等各杖一百徒三年笄瑞庭  
於取供後病故應毋庸議夏以松戴錦山俱定  
地發配折責充徒夏義友王恒興卽王世禮倪  
繼立王玉山均曾代向各圖按米收錢飭交並  
無聽從入局分肥情事應與代為刊板印書之  
張陞太均請照不應重律各杖八十折責發落

巫萬年於于先庚創刊鄉規供不知情惟訪係  
著名訟棍現在該犯恃無證據狡不實供應發  
回句容縣查明有無犯卷並出示招告分別究  
辦殷文起陳學書魏陞元訊無聽從勒派情事  
業經飭釋應與受寄板片之唐榮昇均免置議  
笄瑞庭患病提禁外監身故刑禁人等訊無凌  
虐情弊應毋庸議于先庚建造牌亭飭縣擡送  
在城寺院供奉王德昭局內造而未成該二犯

斂收錢文及夏以松得受錢布均照追入官充  
公各圖分受鄉規刊本飭縣出示收繳同起獲  
板片案結銷毀逸犯胡萬年等緝獲另結無干  
人等概先省釋除備錄供招咨部外所有審明  
定擬緣由理合恭摺具

奏伏乞

皇上聖鑒勅部議覆施行奉

硃批刑部議奏

謝 賞養正書屋全集疏

奏為恭謝

天恩事竊臣齋摺差回捧到

恩賞

御製養正書屋全集一分臣卽恭設香案望

闕叩頭祇領跪讀之下榮感悅服莫能言喻欽惟

皇上學涵淵海

文炳日星際

景運之重熙紹

前徽於

列聖

敷功紫禁久昭

神武之姿

懋典青宮早裕

緝熙之學溯自

六齡就傅洎乎

首祚開元

綜三十四年探索之心

合二十六載承平之頌上始於乾隆乙卯下迄於嘉

慶庚辰將為

模楷之垂壽諸梨棗用

允臣工之請捧出

琳瑯伏觀

弁首之言敬繹

肇名之義在昔

重華紹美元日受終

虞陞傳心早契

乾符於

天眷義文

命額特資蒙養於

聖功

皇上以天亶之聰明秉

祖貽之彞訓

三朝寢膳

龍樓勤

聖孝之孚

一德賡歌

鳳藻協

宸章之和時或游心六藝研慮百家發揮經史之精

闡繹圖書之秘



聖謨洋溢既備見於一冊之中

淵慮謙沖復刪定於

萬幾之暇於是咸韶叶響日月著明遠承

樂善之宏編上繼

味餘之瑰製

元音再覩

甲集先成蓋惟果行育德以為基於是化民成俗而

無外矣臣禱昧何知拜颺徒愧沐

鴻恩之下逮快

祕簡之同瞻

玉振金聲粹然仰

聖人之至德

星輝雲爛煥乎成天下之大文所有微臣榮感下忱

理合繕摺恭謝

天恩伏乞

皇上聖鑒